

Na osnovu člana 41. stav 2. Zakona o sportu u Bosni i Hercegovini ("Službeni glasnik BiH", broj 27/08) i člana 17. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na prijedlog Ministarstva civilnih poslova, na 69. sjednici održanoj 18. decembra 2008. godine, donijelo je

PRAVILNIK

O KATEGORIZACIJI SPORTISTA NA NIVOU BOSNE I HERCEGOVINE

Član 1.

(Predmet)

Ovim Pravilnikom utvrđuju se kategorije sportista/ sportistkinja, postupak svrstavanja sportista u kategorije, kriteriji za kategorizaciju sportista, oblici i način ostvarivanja prava koje sportisti ostvaruju na osnovu kategorizacije sportista na nivou Bosne i Hercegovine.

Član 2.

(Osnov za kategorizaciju sportista)

(1) Osnov za kategorizaciju sportista je odgovarajući ostvareni sportski rezultat ili plasman koji je sportista ostvario na zvaničnom takmičenju na nivou Bosne i Hercegovine, odnosno na zvaničnim međunarodnim takmičenjima u organizaciji međunarodnih sportskih organizacija članica Međunarodnog olimpijskog komiteta (IOC) ili Internacionalnog paraolimpijskog komiteta (IPC) ili Generalne asocijacije internacionalnih sportskih federacija (GAISF).

(2) Sportski rezultat, plasman ili ocena koju sportisti i sportska ekipa postigne na međunarodnom sportskom takmičenju može biti osnov za kategorizaciju pod uvjetom da je nastup sportiste ili sportske ekipe na tom takmičenju odobrio nadležni sportski savez na nivou Bosne i Hercegovine.

Član 3.

(Kategorije)

Sportisti koji su ostvarili značajne sportske rezultate u skladu sa zakonom i drugim aktima, razvrstani su u sljedeće kategorije:

- a) Olimpijski i paraolimpijski sportovi:
 - 1) ZASLUŽNI SPORTISTA:
 - 1.1. osvojeno I-III mjesto na Olimpijskim igrama,
 - 1.2. osvojeno I-III mjesto na prvenstvu svijeta,
 - 1.3. osvojeno I mjesto na prvenstvu Evrope i
 - 1.4. osvojeno I-III mjesto na Paraolimpijskim igrama.
 - 2) SPORTISTA INTERNACIONALNOG RAZREDA -SENIORI
 - 2.1. ispunjena "A" norma za učešće na Olimpijskim igrama,
 - 2.2. ispunjena norma za učešće na Paraolimpijskim igrama,

2.3. osvojeno IV-XII mjesto na svjetskom prvenstvu,

2.4. osvojeno II-V mjesto na evropskom prvenstvu,

2.5. osvojeno I mjesto na Mediteranskim igrama,

2.6. osvojeno I mjesto na Univerzijadi.

3) SPORTISTA INTERNACIONALNOG RAZREDA -JUNIORI

3.1. osvojeno I-III mjesto na juniorskom prvenstvu svijeta;

3.2. osvojeno I-III mjesto na juniorskom prvenstvu Evrope.

4) SPORTISTA SAVEZNOG RAZREDA-SENIORI

4.1. osvojeno I mjesto na seniorskom prvenstvu Bosne i Hercegovine u pojedinačnoj konkurenciji;

4.2. osvojeno I-III mjesto na seniorskom prvenstvu Bosne i Hercegovine u ekipnoj konkurenciji;

4.3. osvojeno I mjesto na seniorskom prvenstvu Balkana

5) SPORTISTA SAVEZNOG RAZREDA-JUNIORI

5.1. osvojeno I mjesto na juniorskom prvenstvu Bosne i Hercegovine,

5.2. osvojeno I mjesto na juniorskom prvenstvu Balkana

b) Neolimpijski sportovi

1. SPORTISTA INTERNACIONALNOG RAZREDA -SENIORI

1.1. osvojeno I mjesto na prvenstvu svijeta

1.2. osvojeno I mjesto na prvenstvu Evrope

2. SPORTISTA SAVEZNOG RAZREDA-SENIORI

2.1. osvojeno II-V mjesto na prvenstvu svijeta u pojedinačnoj i ekipnoj konkurenciji

2.2. osvojeno II-V mjesto na prvenstvu Evrope u pojedinačnoj i ekipnoj konkurenciji

2.3. osvojeno I mjesto na prvenstvu Balkana.

Član 4.

(Period trajanja prava)

Prava na osnovu ostvarenih sportskih rezultata i stečenih zvanja stiču sportisti državljani Bosne i Hercegovine sa stalnim mjestom prebivališta na teritoriji Bosne i Hercegovine i ona traju:

a) za zaslužene sportiste doživotno;

b) za sportiste internacionalnog razreda 4 godine, pod uvjetom da se u tom intervalu aktivno bave sportom i

- c) za sportiste saveznog razreda 2 godine pod uvjetom da se u tom intervalu aktivno bave sportom.

Član 5.

(Dodatni kriterij)

Sportisti koji su po kriterijima klasificirani kao zaslužni sportisti, a sportske rezultate su ostvarili kao reprezentativci bivše Jugoslavije (SFRJ) imaju prava koje propisuje ovaj Pravilnik ukoliko su državljani Bosne i Hercegovine sa stalnim prebivalištem na teritoriji Bosne i Hercegovine i ukoliko po osnovu sportskih rezultata ne primaju bilo kakve naknade u zemljama bivše Jugoslavije.

Član 6.

(Kategorizacija trenera)

Ovom kategorizacijom je obuhvaćen trener sportiste ili selekcije koji su kategorisani u skladu s ovim Pravilnikom.

Član 7.

(Dodjela zvanja)

- (1) Zvanje zaslužnog sportiste Bosne i Hercegovine i sportiste internacionalnog razreda dodjeljuje Ministarstvo civilnih poslova Bosne i Hercegovine (u daljnjem tekstu: Ministarstvo) u skladu sa ovim Pravilnikom.
- (2) Zvanje sportiste saveznog razreda dodjeljuje sportski savez na nivou Bosne i Hercegovine u skladu sa ovim Pravilnikom.

Član 8.

(Komisija za imenovanje)

- (1) Za imenovanje zaslužnog sportiste i sportiste internacionalnog razreda Ministarstvo formira Komisiju za imenovanje, koja se sastoji od pet članova.
- (2) Komisiju čine dva člana predstavnika Ministarstva i po jedan člana entitetskih ministarstava nadležnih za sport i predstavnik Olimpijskog komiteta Bosne i Hercegovine.
- (3) Zadatak Komisije je:
 - a) da provjeri vjerodostojnost ostvarenih sportskih rezultata i način sticanja istih,
 - b) da Ministarstvu pripremi prijedlog odluke o dodjeli zvanja zaslužnog sportiste Bosne i Hercegovine i sportiste internacionalnog razreda, uvažavajući kriterije iz člana 3. ovog Pravilnika, kao i druge kriterije.

Član 9.

(Postupak)

- (1) Kategorizacija sportista se vrši jednom godišnje, a na osnovu rezultata koje sportisti postignu do 31. decembra tekuće godine.
- (2) Ministarstvo dodjeljuje sportska zvanja do 31. marta za proteklu godinu, a na osnovu prijave sportskih saveza na nivou Bosne i Hercegovine koju su dužni dostaviti do 15. februara za proteklu godinu.

(3) Pravo da podnesu prijavu za imenovanje zaslužnih i internacionalnih sportista imaju sportski savezi na nivou Bosne i Hercegovine koji su izvršili preregistriranje u skladu sa Zakonom o sportu u Bosni i Hercegovini.

Član 10.

(Izuzeci)

Sportisti čiji savez blagovremeno ne dostavi prijavu za imenovanje neće biti obuhvaćeni kategorizacijom.

Član 11.

(Gubitak stečenih prava)

(1) Sportista koji je ostvario prava u skladu sa ovim Pravilnikom, a ukoliko mu bude izrečena mjera zabrane takmičenja od strane evropske i svjetske sportske federacije, gubi sva prava prethodno stečena od trenutka pravosnažnosti odluke o zabrani takmičenja.

(2) Istekom mjere zabrane iz stava (1) ovog člana sportista nastavlja da ostvaruje ranije stečena prava, s tim da se vrijeme trajanja mjere zabrane iz stava (1) ovog člana uračunava u vrijeme trajanja ostvarenih prava koja je sportista ostvario u skladu s ovim Pravilnikom.

Član 12.

(Prava zaslužnog sportiste Bosne i Hercegovine)

(1) Sticanjem zvanja zaslužnog sportiste Bosne i Hercegovine sportista ostvaruje pravo na doživotnu novčanu naknadu.

(2) Pravo na novčanu naknadu iz stava (1) ovog člana zaslužni sportista ostvaruje po završetku aktivnog bavljenja sportom a najranije nakon navršanih 30 godina starosti.

Član 13.

(Prava sportiste internacionalnog razreda)

Sticanjem zvanja sportiste internacionalnog razreda sportista ostvaruje pravo na novčanu naknadu na godišnjem nivou u skladu s članom 4. stav b) ovog Pravilnika.

Član 14.

(Prava sportiste saveznog razreda)

Sticanjem zvanja sportiste saveznog razreda sportista ostvaruje prava koja utvrđuje nadležni sportski savez na nivou Bosne i Hercegovine.

Član 15.

(Visina naknade)

(1) Odluku o visini naknade za zaslužnog sportistu Bosne i Hercegovine, kao i sportistu internacionalnog razreda, donosi Vijeće ministara Bosne i Hercegovine na prijedlog Ministarstva.

(2) Sredstva za naknade iz stava 1. ovog člana osiguravaju se u budžetu Ministarstva.

(3) Protiv odluke iz stava (1) ovog člana nije dozvoljena žalba, ali se može pokrenuti upravni spor.

Član 16.

(Izmjene Pravilnika)

Izmjene i dopune ovog Pravilnika vrše se na prijedlog entitetskih ministarstava nadležnih za sport, Olimpijskog komiteta Bosne i Hercegovine, Vijeće za sport Bosne i Hercegovine i Ministarstva, na način i po postupku kako je donesen.

Član 17.

(Stupanje na snagu)

Ovaj Pravilnik stupa na snagu osmog dana od dana objavljivanja u "Službenom glasniku BiH".

VM broj 229/08
18. decembra 2008. godine
Sarajevo

Predsjedavajući
Vijeca ministara BiH
dr. Nikola Špirić, s. r.